

7) Depost la publikigo de la Dua Eldono de la P.V., estis oficialigitaj — kaj devas alpreni la komencan majusklon: ANGORO, APERTURO, APLOMBO, ARBUSTO, AŬGURI, AŬREOLO, AVIADO, BALETO, BANKIERO, BREMSO, BULTENO, FONO, GRAMOFONO, GREGO, HONORARIO, INGREDIENCO, KABINETO, KONCESIO, KONDUKTORO, MONOTONA, PILO, PLAGIATO, SLIPO, STREBI, SUSURI, ŜRUMPI, VINKTO, VIVISEKCIO, VIZIO, kaj la sufikso -END.

Tiujn vortojn, kun la difinoj, oni trovos je ilia alfabeto vico en la P.V., krom BALETO, kiu estas (de nun, erare) montrita kiel derivaĵo de BALO; KONDUKTORO, kies oficiala (kaj kontraŭetimologia) difino diferencas de tiu, kiun ni antaŭe donis, kaj VINKTO, kiun ni preterlasis, ĉar ĝi estis senutila duoblaĵo de «krampo» kaj «nito» (la oficiala difino cetere ne kongruas kun la tradukoj en angla kaj germana lingvo): tiujn du lastajn vortojn oni serĉu do en la Suplemento.

8) Estas zamenhofaj — kaj devas alpreni la signon ^z: KOKERIKO, LITIO, NUMERALO, PARALOGISMO, POTENCIALO, SANDRO, TELEPATIO, TRANĈEO, VICIO.

III. Statistikaj Informoj

Oni jam plurfoje levis la demandon pri la konsisto de nia vorttrezoro, t.e. la nombro de la oficialaj radikoj kaj eĉ de la neoficialaj. La interesatoj trovas ĉi-sube la precizajn informojn.

Por egaligi la komparojn, mi konsideris nek la gramatikajn finaĵojn, nek la proprajn nomojn. Temas do, en la sekvantaj ciferoj, nur pri la nudaj vortradikoj (inkluzive de la afiksoj).

En la Unua Libro (1887) enestis radikoj 904.

En la Universala Vortaro (1894) enestis radikoj 2.599.

En la Fundamento de Esperanto (1905) enestis radikoj 2.666: tio estas do la nombro de la Fundamentaj radikoj.

En la Unua Oficiala Aldono (1909) enestis radikoj 833 (ne enkalkulante la 30, kiuj estis jam en la Fundamenta Ekzercaro).

En la Dua Oficiala Aldono (1919) enestis radikoj 589 (ne enkalkulante la 2, kiuj estis jam en la Fundamenta Ekzercaro, kaj la 1, kiu estis jam en la Unua Aldono).

En la Tria Oficiala Aldono (1921) enestis radikoj 189 (ne enkalkulante la radikojn **jur**, kiu estas simple malkombino de la **jurist** de la Ekzercaro).

En la Kvara Oficiala Aldono (1929) enestis radikoj 118 (rigardante **amor** kiel komunuzan radikojn).

En la Kvina Oficiala Aldono (1934) enestis radikoj 8.

En la Sesa Oficiala Aldono (1935) enestis radikoj 21.

Krome, en 1953 estis oficialigita la sufikso **end**: 1.

La nombro de la Oficialaj radikoj estas do, en tiu ĉi tempo: 1.759. La Fundamentaj kaj la Oficialaj sumiĝas je: 4.425.